

չի հաղորդում: Վարդան պատմիչը ևս չի հաղորդում թվականը, այլ միայն բավականանում է նշելով, որ հալածանքը տեղի է ունեցել Ռոմանոսի ժամանակ և այնուհետև գրում է.

«Շինեաց և թագաւորն Աբաս զկաթուղիկէն ի Կարս գեղեցիկ յօրինուածով»¹:

Կարսի Առաքելոց եկեղեցու շինութիւնը սկսվել է 930 և ավարտվել 942 թվականին²: Նշանակում է, Բյուզանդիայից հալածված հողտրականների տարբեր տեղերում կատարած շինութիւնները, որոնց թվում նաև Սանահնի Աստվածածին եկեղեցունը, այդ ժամանակ էր տեղի ունեցել:

Արդի ուսումնասիրողներից պատմաբան Կարապետ Կոստանյանցն ևս իր «Հայոց վանքերը» ուսումնասիրութեան մեջ Սանահնի հիմնարկութիւնը կապում է Բյուզանդիայից հալածված վարդապետների հետ: Նա այդ վարդապետներին համարում է Սանահնի և մի շարք այլ վանքերի հիմնադիր և վերանորոգող³:

Սակայն, մի քանի պատմագիրներ, ինչպես Ասողիկը (10-րդ դարի վերջ և 11-ի սկիզբ), Սամուել Անեցին (12-րդ դ.), Մխիթար Այրիվանեցին (13-րդ դ.), որոնք մեկ առ մեկ նշել են այդ ժամանակներում շինված վանքերի անունները, ոչ մի բան չեն ասել Սանահնի հիմնարկութեան մասին Աբաս թագավորի օրով⁴:

Հավանաբար այդ բանը նկատի ունենալով է, որ էջմիածնի «Արարատ» ամսագրում 1901 թ. լույս տեսած հոդվածի հեղինակ Եր. Ս.-ն Աբաս թագավորի օրով կատարված կառուցումների մասին եղած տեղեկութիւնները սխալ է համարում⁵:

Մեր կարծիքով, Սանահնի Աստվածածին

եկեղեցին անպայմանորեն ավելի հին է, քան Ամենափրկիչը, որ կառուցվել է դարձյալ 10-րդ դարի երկրորդ կեսին: Աստվածածին եկեղեցին պետք է կառուցված լինի 10-րդ դարի առաջին կեսին, Աբաս թագավորի ժամանակ, մանավանդ որ Գանձակեցու և Վարդան վարդապետի տված տեղեկութիւնները հաստատվում են տեղում գոյութիւն ունեցող շենքի առկայութեամբ, որի կառուցման մասին մինչև այսօր որևէ այլ տեղեկութիւն կամ կարծիք չեն հայտնել ո՛չ հին մատենագիրները և ո՛չ էլ արդի ուսումնասիրողները: Իսկ Ասողիկի, Սամուել Անեցու և Այրիվանեցու լուրերը այդ մասին պետք է բացատրել նրանով, որ նրանք վանքի հիմնադրութիւնը հաշվում են Ամենափրկիչ եկեղեցու կառուցումից, որովհետև այդ ժամանակ էր, որ Սանահնը մտավ հայոց նշանավոր վանքերի շարքը:

Սանահնի վանքի հիմնարկութիւնը Աշոտ Ողորմածի ժամանակներին են վերագրում հին մատենագիրներից շատերը: Այդպես են գրել Ասողիկը, Սամուել Անեցին, Մխիթար Այրիվանեցին, Ստեփանոս Օրբելյանը: Նույն բանը հաստատվում է նաև արքայական մի հրովարտակով, որ մեջ ենք բերել մեր այս ժողովածուում իբրև արձանագրութիւն՝ 189 համարի տակ:

Դեպքերին գրեթե ժամանակակից Ասողիկը Սանահնի վանքի հիմնարկութիւնը վերագրում է Բագրատունյաց Աշոտ Գ Ողորմածին, որ թագավորել է 953—977 թթ.: Այդ մասին նա գրում է.

«Յաւուրս սորա (Աշոտոյ որդոյ Աբասայ) շինեցան կրօնաւորանոցք, ճգնաւորականաց տեղիք Սեւուրդեաց աշխարհին, հաասարակեացք, միաբանականք, ըստ յառաջասացեալ կանոնին սահմանա-

¹ Հաւաքումն պատմութեան Վարդանայ վարդապետի լուսարանեալ, վենետիկ, 1862, էջ 88:

² Թ. Թորամանյան, Նյութեր հայկական ճարտարապետութեան պատմութեան, աշխատութիւնների Բ ժողովածու, Երևան, 1948, էջ 133:

³ Կ. Կոստանյանց, Հայոց վանքերը, Մոսկվա, 1886, էջ 43:

⁴ Ստեփանոսի Տարօնեցւոյ Ասողիկան Պատմութիւն տիեզերական, Երևան, Ս. Պետերբուրգ, 1885, էջ 173—176, Սամուելի քահանայի Անեցւոյ հաւաքումը ի գրոց պատմագրաց, Վաղարշապատ, 1893, էջ 99, Մխիթար Այրիվանեցւոյ Պատմութիւն հայոց, Մոսկվա, 1860, էջ 56:

Ասողիկն իր Պատմութեան վերոհիշյալ էջերում նկարագրում է Կամրջածորի, Հոռոմոսի, Նարեկավանքի, Դերջանի՝ Խլածորի վանքի, Կարնո՝ Հնձուց վանքի, Շիրակի՝ Դպրեվանքի, Արշարունյաց դավանի՝ Կապուտքարի վանքի, Վայոց ձորի՝ Յախաքքարի վանքի հիմնադրութիւնը և տալիս է նույնիսկ նրանցից շատերի հիմնադիր առաջնորդների և նրանց հաջորդների անունները, բայց ոչ մի խոսք չի ասում Սանահնի մասին: Անեցին և Այրիվանեցին, օգտվելով Ասողիկից, նույն վանքերի հիմնարկութեան մասին գրել են ավելի համառոտակի կերպով:

⁵ «Արարատ», 1901, էջ 271—273: